


遼史/卷63



以2024年9月7日从维基文库导出

世表

 姊妹计划: 数据项

天開於子，地闢於丑，人生於寅。天地人之初，一焉耳矣。天動也，有恆度；地靜也，有恆形；人動靜無方，居止靡常。天主流行，地主蓄泄，二氣無往而弗達，亦惟人之所在而畀付焉。

庖犧氏降，炎帝氏、黃帝氏子孫眾多，王畿之封建有限，王政之布濩無窮，故君四方者，多二帝子孫，而自服土中者本同出也。考之宇文周之書，遼本炎帝之後，而耶律儼稱遼為軒轅後。儼志晚出，蓋從周書。蓋炎帝之裔曰葛烏菟者，世雄朔陲，後為冒頓可汗所襲，保鮮卑山以居，號鮮卑氏。既而慕容燕破之，析其部曰宇文，曰庫莫奚，曰契丹。契丹之名，昉見于此。

隋、唐之際，契丹之君號大賀氏。武后遣將擊潰其眾，大賀氏微，別部長過折代之。過折尋滅，迭刺部長涅里立迪鞏組里為阻午可汗，更號遙輦氏。唐賜國姓，曰李懷秀。既而懷秀叛唐，更封楷落為王。而涅里之後曰耨里思者，左右懷秀。楷落至于屈戌幾百年，國勢復振。

至耨里思之孫曰阿保機，^[1]功業勃興，號世里氏，是為遼太祖。於是世里氏與大賀、遙輦號「三耶律」。自時厥後，國日益大。起唐季，涉五代、宋，二百餘年。

名隨代遷，字傳音轉，此其言語文字之相通，可考而知者也。其所不可知者，有若奇首可汗、胡刺可汗、蘇可汗、昭古可汗，皆遼之先，而世次不可考矣。摭其可知者，作遼世表。

帝統 契丹先世。

漢 冒頓可汗以兵襲東胡，滅之。餘衆保鮮卑山，因號鮮卑。

魏 青龍中，部長比能稍桀驁，為幽州刺史王雄所害，散徙潢水之南，黃龍之北。

晉 鮮卑葛烏菟之後曰普回。普回有子莫那，自陰山南徙，始居遼西。九世為慕容晃所滅，^[2]鮮卑眾散為宇文氏，或為庫莫奚，或為契丹。

元 契丹國在庫莫奚東，異族同類，東部鮮卑之別支也，至是始自號契丹。為慕容氏所破，俱竄松漠之間。道武帝登國間，大破之，遂與庫莫奚分背。經數十年，稍滋蔓，有部落於和龍之北數百里。太武帝太平真君以來，歲致名馬。獻文時，使莫弗紇何辰來獻，始班諸國末，欣服。^[3]萬丹部、何大何

部、伏弗郁部、羽陵部、日連部、匹絜部、黎部^[4]吐六于部以名馬文皮來貢，得交市于和龍、密雲之間。**太和三年**，高句麗與蠕蠕謀取地豆于以分之，契丹懼，莫弗賀勿于率其部落車三千乘、眾萬餘口內附，止於白狼水東。

天保四年九月，契丹犯塞，文宣帝親討之，至平州，乃趨長壘。^[5]司徒潘相樂率精騎五千，自東北道趨青山；安德王韓軌帥騎四千東斷走路。帝親踰齊山嶺奮擊，虜男女十餘萬，雜畜數十萬。相樂又於青山大破別部，所虜生口分置諸州。復為突厥所逼，又以萬家寄處高麗境內。

開皇四年，率諸莫弗賀來謁。五年，悉眾款塞，高祖納之，聽居故地。六年，諸部相攻不止，又與突厥相侵，高祖使使諭解之。別部出伏等違高麗，率眾內附，置於渴奚那頡之北。開皇末，別部^隋四千餘戶違突厥來降，高祖給糧遣還；固辭不去，部落漸眾。遂北徙，逐水草，當遼西正北二百里，依紇臣水而居。^[6]東西互五百里，南北三百里，分為十部，兵多者三千，少者千餘。有征伐，酋帥相與議之，興兵則合符契。突厥沙鉢略可汗遣吐屯潘垓統之，契丹殺吐屯。大業七年，貢方物。

唐 契丹地直京師東北五千里而羸，東距高麗，西奚，南營州，北靺鞨、室韋，阻冷陁山以自固。射

獵居處無常。其君大賀氏有勝兵四萬，析八部，臣于突厥，以為俟斤。凡調發攻戰，則諸部畢會，獵則部得自行。與奚不平，每鬪不利，輒遁保鮮卑山。武德初，^[7]大帥孫敖曹與靺鞨長突地稽俱來朝。二年，入犯平州境。六年，君長咄羅獻名馬、豐貂。貞觀二年，摩會來降，突厥請以梁師都易契丹，太宗曰：「契丹、突厥不同類，師都唐編戶，我將擒之，不可易降者。」三年，摩會入朝，賜鼓纛，由是有常貢。帝伐高麗，悉發契丹、奚首領從軍。還過營州，以窟哥為左武衛將軍。大帥辱紇主據曲率眾來歸，^[8]即其部為玄州，以據曲為刺史，隸營州都督府。窟哥舉部內屬，乃置松漠都督府，以窟哥為都督，封無極男，賜姓李氏。以達稽部為峭落州，紇便部為彈汗州，獨活部為無逢州，芬間部羽陵州，突便部為日連州，芮奚部為徒河州，墜斤部為萬丹州，伏部為匹黎、赤山二州，俱隸松漠府，以辱紇主為刺史。窟哥死，與奚叛，行軍總管阿史德樞賓執松漠都督阿不固，^[9]獻于東都。窟哥二孫：曰枯莫離，彈汗州刺史、歸順郡王；曰盡忠，松漠都督。敖曹曾孫曰萬榮，^[10]歸誠州刺史。時營州都督趙文翽數侵侮其下，盡忠等怨望，與萬榮共舉兵，殺文翽，據營州，自號「無上可汗」，推萬榮為帥。不二旬，眾數萬，攻崇州，執擊討副使許欽寂。武后怒，詔將軍曹仁師等二十八將擊之，更號萬榮曰「萬斬」，盡忠曰「盡滅」。戰西硤石黃獐谷，王師敗績。進攻平州，不克。武后益發兵擊契丹。萬榮夜襲檀州，清邊道副總管張九節拒戰，萬榮敗走。俄盡忠死，突厥默啜襲破其部。

萬榮收散兵，復振。別將駱務整、何阿小入冀州，殺刺史陸寶積，掠數千人。武后聞盡忠死，詔夏官尚書王孝傑等率兵十七萬討萬榮，戰東硤石，敗績，孝傑死之，萬榮進屠幽州。又詔御史大夫婁師德等率兵二十萬擊之，萬榮乘銳，鼓行而南，殘瀛州屬縣。神兵道總管楊玄基率奚掩擊，[\[11\]](#)大破萬榮，執何阿小，別將李楷固、駱務整降。萬榮委軍走，玄基與奚四面合擊，萬榮眾潰，東走。張九節設三伏待之。萬榮窮蹙，與家奴輕騎走潞河東，憊甚，臥林下。奴斬其首以獻，九節傳東都。契丹餘眾不能立，遂附突厥。[開元二年](#)，盡忠從父弟失活率部落歸唐。

失活，玄宗賜丹書鐵券。[開元四年](#)，與奚長李大酺偕來，詔復置松漠府，以失活為都督，封松漠郡王；仍置靜析軍；以失活為經略大使，八部長皆為刺史。五年，以楊氏為永樂公主下嫁失活。[\[12\]](#)六年，卒。

娑固，失活之弟，帝以娑固襲爵。[開元七年](#)十一月，娑固與公主來朝。衙官可突于勇悍，得眾心，娑固欲除之；事泄，可突于攻之，娑固奔營州。都督許欽澹及奚君李大酺攻

可突于，不勝，娑固、大酺皆死。韓愈作可

突干，劉昫、宋祁及[唐會要](#)皆作可突于。

鬱于，娑固從父弟也，可突于推以為主，遣使謝罪，玄宗冊立襲娑固位。[開元十年](#)，鬱于入朝，以慕容氏為燕郡公主下嫁鬱于，卒。

咄于，[\[13\]](#)鬱于之弟，襲官爵。[開元十三年](#)，咄于復與可突于猜阻，與公主來奔，改封遼陽王。[\[14\]](#)

邵固，咄于之弟，[\[15\]](#)國人共立之。開元十三年冬，朝于行在，從封禪泰山，改封廣化郡王，以陳氏為東光公主下嫁邵固。[\[16\]](#)十八年，為可突于所弑，以其眾降突厥，東光公主走平盧。

屈列，[\[17\]](#)不知其世系，可突于立之。[開元二十二年](#)六月，幽州節度使張守珪大破可突于。[\[18\]](#)十二月，又破之，斬屈列及可突于等，傳首東都，餘眾散走山谷。

過折，[\[19\]](#)本契丹部長，為松漠府衙官，斬可突于及屈列歸唐。幽州節度使張守珪立之，封北平郡王。是年，可突于餘黨泥禮弑過折，屠其家，一子刺乾走安東，拜左驍衛將軍。自此，契丹中衰，大賀氏附庸於奚王，以通于唐，朝貢歲至。至德、寶應間再至，大曆中十三至，[\[20\]](#)[貞元九年](#)、十年、十一年三至，元和中七至，太和、開成間四至。泥禮，耶律儼遼史書為涅里，陳大任書為雅里，蓋遼太祖之始祖也。

李懷秀，唐賜姓名，契丹名迪輦俎里，^[21]本八部大帥。天寶四年降唐，拜松漠都督。安祿山表請討契丹，懷秀發兵十萬，^[22]與祿山戰潢水南，祿山大敗，自是與祿山兵連不解。耶律儼紀云，太祖四代祖耨里思為迭刺部夷離堇，遺將只里姑、括里，大敗范陽安祿山于潢水，適當懷秀之世。則懷秀固遙輦氏之首君，為阻午可汗明矣。

楷落，以唐封恭仁王，代松漠都督，遂稱契丹王。其後寢大，貞元四年，犯北邊，幽州以聞。自祿山反，河北割據，道隔不通，世次不可悉考。^[23]

契丹王屈戌，武宗會昌二年授雲麾將軍，是為耶瀾可汗。^[24]幽州節度使張仲武奏契丹舊用回鶻印，乞賜聖造，詔以「奉國契丹」為

文。 高麗古今錄作屈戌。

契丹王習爾，^[25]是為巴刺可汗。咸通中，再遣使貢獻，部落寢強。

契丹王欽德，習爾之族也，是為痕德堇可汗。光啟中，鈔掠奚、室韋諸部，皆役服之，數與劉仁恭相攻。晚年政衰。八部大人，法常三歲代，迭刺部耶律阿保機建旗鼓，自為一部，不肯受代，自號為王，盡有契丹國，遙輦氏遂亡。

蕭韓家奴有言，先世遙輦可汗洼之後，國祚中絕，自夷離董雅里立阻午可汗，大位始定。今以唐史、遼史參考，大賀氏絕于邵固，雅里所立則懷秀也，其間唯屈列、過折二世。屈列乃可突于所立，過折以別部長為雅里所殺。唐史稱泥里為可突于餘黨，則洼可汗者，殆為屈列耶？

校勘記

1. ↑ 耨里思之孫曰阿保機 孫，據太祖紀贊及下文「太祖四代祖耨里思」，應是玄孫。
2. ↑ 為慕容晃所滅 據晉書一〇九前燕載記，「晃」應作銑。
3. ↑ 始班諸國未欣服 按此源於魏書一〇〇契丹傳：「得班饗於諸國之末」，「心皆忻慕」，「莫不思服」，欣服二字，語義不完。
4. ↑ 萬丹部 至 黎部 萬丹部，按營衛志中及魏書一〇〇、新唐書二一九契丹傳並作悉萬丹部。日連部，連原誤「速」，據營衛志中及魏書、新唐書契丹傳改。伏弗郁、羽陵、匹絜、黎等部參卷三二校勘記[二][三]。
5. ↑ 長漚 漚原誤「漸」，據北齊書四文宣紀及北史九四契丹傳改。
6. ↑ 紇臣水 按隋書八四、北史九四契丹傳作託紇臣水。

7. ↑武德初 初原作「中」，據下文二年及舊唐書一九九下契丹傳改。
8. ↑辱紇主據曲 辱紇主原誤「紇主」，據新唐書二一九契丹傳改。據曲，參卷三二校勘記[七]。
9. ↑阿不固 按新唐書契丹傳作阿卜固。
10. ↑敖曹曾孫曰萬榮 曾孫，舊唐書契丹傳同。新唐書契丹傳作「有孫曰萬榮」。
11. ↑神兵道總管楊玄基 原作神兵總管楊立基，據新唐書契丹傳改。
12. ↑五年以楊氏為永樂公主下嫁失活 按舊唐書契丹傳，「開元三年，其首領李失活率種落內附。明年，失活入朝，封宗室外甥女楊氏為永樂公主以妻之。」
13. ↑咄于 按新、舊唐書契丹傳及通考三四五並作吐于。
14. ↑遼陽王 按新、舊唐書契丹傳作遼陽郡王。
15. ↑邵固咄于之弟 按新、舊唐書契丹傳作李盡忠之弟。
16. ↑東光公主 新、舊唐書契丹傳作東華公主。
17. ↑屈列 新唐書契丹傳作屈烈，張九齡曲江集八作據埒。
18. ↑幽州節度使張守珪 新、舊唐書契丹傳並作幽州長史張守珪。按當時張守珪官銜為「幽州節度副大使、幽州長史兼御史大夫」，見曲江集九。
19. ↑過折 按曲江集卷五、卷八作鬱捷，卷九、卷十一作過折。遇、鬱音同，過似應作遇。
20. ↑大曆中十三至 原誤「大曆十二年」，據新唐書契丹傳改。按大曆凡十四年，約每年一次。
21. ↑契丹名迪輦俎里 按上文作迪輦組里。

22. ↑懷秀發兵十萬 按新唐書契丹傳，安祿山發幽州、雲中、平盧、河東兵十餘萬。非懷秀發兵十萬。
23. ↑世次不可悉考 按百官志一，遙輦九帳大常袞司已列遙輦九世可汗世次。
24. ↑授雲麾將軍是為耶瀾可汗 「是為耶瀾可汗」原在下文「幽州節度使」下，誤以屈戌為幽州節度使。據新唐書契丹傳改。
25. ↑習爾 新唐書契丹傳作習爾之。



本元朝作品在全世界都属于公有领域，因为作者逝世已经远远超过100年。

About this digital edition

This e-book comes from the online library [Wikisource](#)^[1]. This multilingual digital library, built by volunteers, is committed to developing a free accessible collection of publications of every kind: novels, poems, magazines, letters...

We distribute our books for free, starting from works not copyrighted or published under a free license. You are free to use our e-books for any purpose (including commercial exploitation), under the terms of the [Creative Commons Attribution-ShareAlike 3.0 Unported](#)^[2] license or, at your choice, those of the [GNU FDL](#)^[3].

Wikisource is constantly looking for new members. During the realization of this book, it's possible that we made some errors. You can report them at [this page](#)^[4].

The following users contributed to this book:

- Wmrwiki
- Morning2k
- Timmyshin
- Rocket000
- Jdx
- Boris23

- KABALINI
- Bromskloss
- Tene~commonswiki
- AzaToth
- Bender235
- PatríciaR
- Dbenbenn

-
1. [↑ https://wikisource.org](https://wikisource.org)
 2. [↑ https://www.creativecommons.org/licenses/by-sa/3.0](https://www.creativecommons.org/licenses/by-sa/3.0)
 3. [↑ https://www.gnu.org/copyleft/fdl.html](https://www.gnu.org/copyleft/fdl.html)
 4. [↑ https://wikisource.org/wiki/Wikisource:Scriptorium](https://wikisource.org/wiki/Wikisource:Scriptorium)